

UMJESTO PREDGOVORA

Ova knjiga je samo prvi dio opsežnog "UVODA U METODOLOGIJU NAUČNOISTRAŽIVAČKOG RADA DRUŠTVENIH NAUKA" koja je u pripremi. Naime, još kao studenti osjećali smo otpor prema knjigama sa ovom tematikom. Naravno, ne zbog sadržaja već zato što su sve redom bile veoma obimne.

U udžbeniku koji je pred vama i koji je samo jedan dio pomenute obimne knjige koja je u pripremi, željeli smo da vas upoznamo sa najelementarnijim pojmovima, činjenicama i objašnjenjima pojmova; na primjer, šta je to nauka, naučnoistraživački rad, šta su metode u nauci, odnos naučne metode i metodologije, tehnike istraživanja i dr. Ukratko, želimo na najkoncizniji i najjednostavniji način način da objasnimo metodologiju naučnoistraživačkog rada. Zato, u ovoj knjizi, izuzev korištene literature, nećete naći ni rezime, ni zaključna razmatranja, već samo ono elementarno i neophodno što je potrebno kako bi stekli osnovna znanja o metodologiji naučnoistraživačkog rada.

Onima koje ova oblast privlači mnogo više od od elementarnog znanja, preporučujemo "Uvod u metodologiju naučnoistraživačkog rada" djelo u kome smo šire elaborirali ono što smo, sa naučnog stanovišta ovdje samo naglasili. Primjera radi, u poglavlju tehnike prikupljanja i obrade empirijskih podataka obradili smo i one metode o kojima je nimalo i vrlo malo pisano na ovim prostorima, a na kojima se baziraju društvena (i ne samo društvena) istraživanja u svijetu. Takođe, posebno smo obradili mjesto i ulogu informatičkih znanja u sređivanju, obradi i analizi prikupljenih podataka, o čemu do sada, barem na ovim prostorima nije pisano.

Kao posebnu praktičnu vježbu na kraju knjige ubacili smo nekoliko desetina pitanja iz gradiva koje je sastavni dio ovog udžbenika kako bi sami provjerili u kojoj ste mjeri savladali gradivo, odnosno metodologiju naučnoistraživačkog rada u društvenim naukama.

Nadamo se da ćete iz udžbenika koji je pred vama naučiti bez pretjeranog napora ono najosnovnije, a to i jeste cilj.

Ovaj udžbenik namijenjen je prvenstveno studentima dodiplomskog i postdiplomskog studija koji kao redovan predmet slušaju metodologiju naučnoistraživačkog rada, kao i ostalim studentima koji pokazuju interes za ovu oblast, jer pisan je na jednostavan i prihvatljiv način, da se bez pretjeranog napora nauči ono najosnovnije.

Udžbenik je objavljen na hrvatskom i na bosanskom jeziku, jer i njegovi autori govore i pišu na bosanskom, odnosno hrvatskom jeziku, a i većini studenata kojima je prevashodno i namijenjen ovaj udžbenik, hrvatski i bosanski jezik su maternji.

Autori